

XXXIX^{au} Conselh Plenèr de la CTP

Lo 13 de deceme de 2021

Declaracion deu Conselh Plenèr

Lo president deu Govèrn basco, la presidenta de la region Occitania, la presidenta deu Govèrn de Navarra, la ministra deus Ahars exteriors deu Govèrn d'Andòrra, com presidenta de l'Organisme andorran de cooperacion transfronterèra, lo president de la region Navèra Aquitània, lo president deu Govèrn d'Aragon, lo president de la Generalitat de Catalonha, qui s'encarga aqueste còp de la presidéncia deu *Consòrci* de la Comunautat de tribalh deus Pirenèus (CTP), amassats en Conselh plenèr lo 13 de deceme de 2021 a Alp (Cerdanha, Catalonha), qu'adòptan la declaracion comuna seguenta entà :

- Arremerciar calorosament las Mairias d'Alp e de Puigcerdà per la lor implicacion en l'organizacion d'aqueste Conselh plenèr.
- Amuïshar la nosta reconeishença a l'accion de l'Associacion de las regions fronterèras d'Euròpa (ARFE) entau son 50^{au} anniversari.

Union Europèa

- Demandar suu pic a las institucions europèas d'ahortir la cooperacion transfronterèra e de la plaçar au miei de las prioritats politics de l'Union europèa. La Conferéncia tà çò de l'avièner d'Euròpa, a la quau e participan la CTP e los sons sòcis, que deverà avançar en aqueth sens.
- Arreconéisher l'importància de continuar a progressar en la negociacion de l'Acòrd d'associacion d'Andòrra dab l'Union Europèa entà melhorar los escambis dab lo Principat e promòver los mecanismes de cooperacion territorialu capvath los Pirenèus.
- Constatar que las restriccions ligadas a la mobilitat impausadas dab la mira de combàter la propagacion de la pandemia b'aportèn consequéncias de las seriosas capvath los territòris fronterèrs. Be n'ei donc primordiau que la dimension transfronterèra e sia integrada en la gestion de las crisis a viéner.
- Manifestar lo lor inquietèr tà çò deu manteniment de la barradura despuish quasi un an de dètz passatges fronterèrs enter Espanha e França, çò qui pòrta prejudici a la mobilitat deus ciutadans transfronterèrs e qui hè domau a l'esperit deu Tractat de Schengen.
- Reivindicar la frontèra com espaci de gestion eficaça e de convivéncia. Sostiéner la demanda deu Comitè europèu de las Regions d'establir un modèl de govèrn multinivèu transfronterèr qui participa ad aqueth objectiu.
- Constatar la persisténcia d'obstacles administratius e juridics a la cooperacion transfronterèra. En aqueth esgard, la CTP qu'adoptè en març

passat ua declaracion de sostien au Mecanisme europèu de cooperacion transfronterèra e qu'encoratja la presidéncia francesa de l'Union Europèa a viéner a desblocar las negociacions entà adoptar aqueth instrument juridic.

- Reïterar l'engatjament de la CTP cap a la societat civila deus sons territòris. Lo ben-estar deus sons poblants e la mesa en valor de las caracteristicas socialas, culturaus, lingüisticas e economicas particularas de l'espaci transfronterèr qu'a d'estar au còr de las decisions. En aqueth esgard, la CTP que signè en julhet de 2020 l'iniciativa de l'Aliança europèa entaus ciutadans transfronterès.
- Sostiéner l'avís deu Comitè europèu de las Regions entà ahortir los servicis publics transfronterès, e participar atau a melhorar la vita vitanta deus ciutadans e de las enterpresas dens las zònas fronterèras.

Estrategia Pirenenca 2018-2024

- Felicità's de la mesa en òbra de l'Estrategia Pirenenca 2018-2024 entà tornar aviar la cooperacion transpirenenca, peu mejan de las activitats seguentas :
- L'aprobacion de l'Estrategia pirenenca deu cambiament climatic (EPiCC), arron mei d'ua annada de procèssus participatiu larg e inclusiu. Que s'ageish de la purmèra estrategia deu tipe entà un apròchi transfronterèr pertocant ua zòna de montanha particularament fragila. L'EPiCC que pòrta ua vision partatjada cap a l'horizont 2050 e que fixa las linhas d'accions a seguir dab un plan operacionau dinc a 2030 e lo desvelopament escadut de projèctes europèus pertocant l'atenuacion e l'adaptacion au cambiament climatic.
- L'aviada de l'iniciativa de l'Aliança deus sòus pirenencs (ASPIr), dont la CTP ei l'un deus promotors, arron proposicion per la FAO. Qu'a l'objectiu de melhorar e méter en comun l'informacion e sensibilizar a l'estudi deus sòus, dab per mira d'évitar la lor degradacion.
- L'escaduda qui coneishó lo Fòrum Transpirenenç de la Joenessa dont l'objectiu ei d'encoratjar lo dialògue enter la joenessa e las elejudas e los elejuts capvath los Pirinèus dab l'intencion de'u hestegar tot an quan s'aprèssa l'Annada europèa de la joenessa de 2022 atau com lo bon arcuelh deu seminari *Europe's present and future : the contribution of young people to cross-border territories*, dens l'encastre de la 19^{au} Setmana europèa de las Regions e de las vilas, dab la participacion de la Coordinadora de l'Union europèa entà la joenessa.
- Las contribucions de la CTP pertocant las tematicas de santat, de patrimòni culturau, d'economia circulara.
- L'aviada, dab las Euroregions NAEN e Pirenèus-Mediterranèa e lo GECT Pirineos-Pyrénées, de l'aperet a microprojèctes entau territòri pirenenç, finançat peu reliquat deu POCTEFA 2007-13. Que s'ageish d'un procediment coerent de reutilizacion deus hons F.E.D.E.R. au profieit de las idèas de projèctes desvelopadas peus actors transfronterès.

- L'iniciativa deu Govèrn d'Aragon, d'integrar progressivament la lenga aragonesa dens las activitats e documentacion de la CTP. Atau que contribueish a la construccion d'un ecosistèma lingüistic transfronterèr e a la promocion de totas las lengas deu territòri transfronterèr.

Programa operacionau cooperacion territorialu Espanha-França-Andòrra (POCTEFA)

- Arregaudí's de la pujada de l'envolòpa F.E.D.E.R. qui serà alogada au POCTEFA, en tot regretar que las envolòpas alogadas a la cooperacion territorialu de faïçon generau e demoran hèra redusidas per rapòrt a l'envolòpa globau de la coesion.
- Notar l'avançada deu programa POCTEFA 2014-20, atau com los resultats positius e probants deus projèctes realizats capvath los bacins de vita fronterèrs nostes.
- Felicità's de l'avançada de l'elaboracion deu programa POCTEFA 2021-27 a vièner qui serà presentat per aprobacion definitiva a la Comission europèa pendent lo purmèr semèstre de 2022. Lo purmèr aperet a projèctes que serà deu son costat aviat au segond semèstre d'aquera medisha annada.
- Soslinhar lo caractèr innovant de la creacion de las zònas foncionaus entau prètzhèit « ua Euròpa mei pròcha deus ciutadans » dens l'encastre d'aqueth periòde navèth de programacion. Que s'ageish clarament d'ua grana oportunitat d'ahortiment de la cooperacion transfronterèra de proximitat entau territòri noste.
- Arremerciar los partenaris institucionaus deu programa entau tribalh de hèit e soslinhar la bona collaboracion dab la Comission europèa.

En. Alain Rousset

President

Conselh Regionau Navèra Aquitània

En. Francisco Javier Lambán Montañés

President

Govèrn d'Aragon

En. Pere Aragonès i Garcia

President

Generalitat de Catalonha



XXXIX
CONSELL PLENARI
OSOKO KONTSEILUA
CONSEIL PLÉNIER
CONSELH PLENARI
CONSEJO PLENARIO

En. Iñigo Urkullu Renteria

President

Govèrn Basco

Na. Carole Delga

Presidenta

Conselh Regionau Occitania

Na. María Chivite Navascués

Presidenta

Govèrn de Navarra

Na. Maria Ubach Font

Presidenta

Organisme Andorran de Cooperacion transfronterera

Ministra deus Ahars Exteriors

Govèrn d'Andorra